

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ১২৭/২০১৭

ঢাকা, সোমবার ৩ জুলাই ২০১৭, ১৯ আষাঢ় ১৪২৪

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। রাষ্ট্রপতির সঙ্গে প্রধানমন্ত্রীর সাক্ষাৎ
- ২। ঘুষ ও দুর্নীতি বন্ধে সচিবদের প্রতি নির্দেশ প্রধানমন্ত্রীর
- ৩। চট্টগ্রাম কাস্টম হাউস ২৪ ঘন্টা খোলা রাখতে হবে : প্রধানমন্ত্রী
- ৪। সরকার চলতি অর্থবছরে ১৫ লাখ মেট্রিক টন চাল আমদানি করবে
- ৫। হাওরে বাঁধ নির্মাণের দুর্নীতিতে ৬১ জনের বিরুদ্ধে মামলা
- ৬। পাহাড়ি ঢলে তিন জেলায় দুই লাখ মানুষ পানিবন্দী
- ৭। ছয় প্রকল্পে ১৩ হাজার কোটি টাকা দিচ্ছে জাইকা
- ৮। বিচারকদের চাকরি বিধিমালার গেজেট ১৫ জুলাইয়ের মধ্যে : আইনমন্ত্রী
- ৯। মানবাধিকার সম্মেলন এসডিজি অর্জনে ভূমিকা রাখবে : স্পিকার
- ১০। জঙ্গিবাদ নির্মূলে গোটা জাতিকে এগিয়ে আসতে হবে : আইজিপি

১। রাষ্ট্রপতির সঙ্গে প্রধানমন্ত্রীর সাক্ষাৎ

প্রধানমন্ত্রী শেখ হাসিনা গতকাল ২ জুলাই রোববার সন্ধ্যায় বঙ্গভবনে রাষ্ট্রপতি মো. আবদুল হামিদের সঙ্গে সৌজন্য সাক্ষাৎ করেছেন। রাষ্ট্রপতির প্রেস সচিব জয়নাল আবেদীন জানান, প্রধানমন্ত্রী শেখ হাসিনা রাষ্ট্রপতির সঙ্গে ঈদের শুভেচ্ছা বিনিময় করেন। এ ছাড়া প্রধানমন্ত্রী সম্প্রতি তাঁর সুইডেন সফর এবং জাতীয় সংসদের ২০১৭-১৮ অর্থবছরের বাজেট পাস সম্পর্কে রাষ্ট্রপতিকে অবহিত করেন। সূত্র-প্রথম আলো (পৃ.২,ক.৮), ইত্তেফাক (পৃ.১৯,ক.৭), ডেইলি সান (পৃ.৩,ক.৩), ইন্ডিপেনডেন্ট (পৃ.২,ক.১)।

২। ঘুষ ও দুর্নীতি বন্ধে সচিবদের প্রতি নির্দেশ প্রধানমন্ত্রীর

চলতি অর্থবছরের বাজেট বাস্তবায়নে সচিবদের আরও আন্তরিক হওয়ার আহ্বান জানিয়েছেন প্রধানমন্ত্রী শেখ হাসিনা। তিনি বলেন, এবারের বাজেট দেশের ইতিহাসে সবচেয়ে বড়, তা বাস্তবায়নে সবাইকে একযোগে কাজ করতে হবে। শেষ দিকে তাড়াহুড়া না করে অর্থবছরের শুরুতেই বাস্তবায়নের কৌশল নির্ধারণ করতে হবে। বেতন-ভাতা বাড়ানোর প্রসঙ্গ উল্লেখ করে দুর্নীতি বন্ধের আহ্বান জানিয়ে প্রধানমন্ত্রী বলেন, সীমিত বাজেটের মধ্য থেকে বেতন প্রায় দ্বিগুণ করা হয়েছে। এর মূল্যায়ন আপনাদেরই করতে হবে। প্রতিটি ক্ষেত্রে দুর্নীতি বন্ধ করতে হবে। দুর্নীতি প্রশ্নে কাউকে ছাড় দেওয়া হবে না। গতকাল ২ জুলাই রোববার সচিবালয়ে সচিব সভার বৈঠকে প্রধানমন্ত্রী শেখ হাসিনা এসব কথা বলেন। সূত্র-সমকাল (শেষ পৃ.,ক.২), সংবাদ (পৃ.১,ক.৬), ডেইলি সান (পৃ.১,ক.৪), ইন্ডিপেনডেন্ট (শেষ পৃ.,ক.২)। জনকণ্ঠ, ইনকিলাব, ডেইলি সান, নিউ এজ, এশিয়ান এজ এ বিষয়ে ছবিসহ খবর ছেপেছে।

৩। চট্টগ্রাম কাস্টম হাউস ২৪ ঘন্টা খোলা রাখতে হবে : প্রধানমন্ত্রী

দেশের প্রধান রাজস্ব আদায়কারী প্রতিষ্ঠান চট্টগ্রাম কাস্টম হাউস ২৪ ঘন্টা খোলা রাখার নির্দেশ দিয়েছেন প্রধানমন্ত্রী শেখ হাসিনা। গতকাল ২ জুলাই রোববার সচিবালয়ে অনুষ্ঠিত সচিব সভায় আমদানি-রফতানির সুবিধার্থে এ নির্দেশ দেন তিনি। সভা শেষে মন্ত্রিপরিষদ বিভাগের সচিব (সমন্বয় ও সংস্কার) এনএম জিয়াউল আলম বিষয়টি জানান। সূত্র-যুগান্তর (পৃ.১,ক.১)।

৪। সরকার চলতি অর্থবছরে ১৫ লাখ মেট্রিক টন চাল আমদানি করবে

দেশে স্থিতিশীল খাদ্যপণ্যের মূল্য নিয়ন্ত্রণে রাখাসহ খাদ্য ঘাটতি পূরণে সরকার চলতি আর্থিক বছরে বিদেশ থেকে ১০ থেকে ১৫ লাখ মেট্রিক টন চাল আমদানির পরিকল্পনা গ্রহণ করেছে। গতকাল ২ জুলাই রোববার খাদ্য অধিদফতরের মহাপরিচালক বদরুল হাসান বলেন, 'প্রাথমিকভাবে আমাদের ৬ লাখ মেট্রিক টন চাল আমদানির পরিকল্পনা রয়েছে, তবে খাদ্য ঘাটতি পূরণে এই আমদানির পরিমাণ ১০ থেকে ১৫ লাখ মেট্রিক টনে বাড়তে পারে। সূত্র-ইত্তেফাক (শেষ পৃ.,ক.১), ডেইলি সান (শেষ পৃ.,ক.৬), এশিয়ান এজ (পৃ.১১,ক.১)।

৫। হাওরে বাঁধ নির্মাণের দুর্নীতিতে ৬১ জনের বিরুদ্ধে মামলা

হাওরে বাঁধ নির্মাণে দুর্নীতি, অনিয়ম ও কর্তব্যে অবহেলার অভিযোগে সিলেট-সুনামগঞ্জ অঞ্চলে পানি উন্নয়ন বোর্ডের (পাউবো) ১৫ কর্মকর্তা এবং সংশ্লিষ্ট ৪৬ ঠিকাদারসহ ৬১ জনের বিরুদ্ধে মামলা করেছে দুর্নীতি দমন কমিশন। গতকাল ২ জুলাই সুনামগঞ্জ সদর থানায় দুদকের সহকারী পরিচালক ফারুক আহমেদ বাদী হয়ে এ মামলা করেন। মামলার পরপরই সুনামগঞ্জে পাউবোর নির্বাহী প্রকৌশলী মো. আফসার উদ্দিনসহ দুজনকে গ্রেফতার করেছে দুদক। এছাড়া বাকি আসামিদের গ্রেফতারেও অভিযান চলছে। দুদকের উপ পরিচালক (গণমাধ্যম) প্রণব কুমার ভট্টাচার্য এ তথ্য নিশ্চিত করেছেন। সূত্র-সংবাদ (পৃ.১,ক.১), প্রথম আলো (পৃ.১,ক.৮) ডেইলি সান (শেষ পৃ.,ক.২), ইন্ডিপেনডেন্ট (পৃ.১,ক.৮)।

৬। পাহাড়ি ঢলে তিন জেলায় দুই লাখ মানুষ পানিবন্দী

বর্ষণ ও উজান থেকে নেমে আসা পাহাড়ি ঢলে সিলেট, রংপুর ও নীলফামারীতে পানিবন্দী হয়ে পড়েছে দুই লাখেরও বেশি মানুষ। তলিয়ে গেছে বিস্তীর্ণ এলাকার ধানী জমি। এছাড়া পানিতে তলিয়ে যাওয়ায় বন্ধ করে দেওয়া হয়েছে বহু শিক্ষাপ্রতিষ্ঠান। সিলেটের অতিরিক্ত জেলা প্রশাসক শহীদুল ইসলাম চৌধুরী জানান, ভারতের মেঘালয় ও আসাম রাজ্যে টানা বৃষ্টির কারণে বরাক নদীতে পানি বেড়ে যাওয়ায় বরাকের শাখা সুরমা ও কুশিয়ারা নদীতে পানি বৃদ্ধি পেয়েছে। নদীর পানি তীর উপচে গ্রাম এলাকায় প্রবেশ করছে। ফলে নদী অববাহিকায় গ্রামগুলো তলিয়ে গেছে। এপ্রিলে অতিবৃষ্টি আর বন্যায় হাওড়ে ফসলহানির পর আবার নতুন দুর্ঘোণে দিশেহারা হয়ে পড়েছে এলাকার মানুষ। প্রশাসন থেকে দুর্গতদের মাঝে দ্রুত সহায়তা দেয়ার উদ্যোগ নেওয়া হচ্ছে। সূত্র-জনকণ্ঠ (পৃ.১,ক.২), সংবাদ (পৃ.১,ক.১), ডেইলি সান (পৃ.২,ক.৫), ইন্ডিপেনডেন্ট (শেষ পৃ.,ক.৭)।

৭। ছয় প্রকল্পে ১৩ হাজার কোটি টাকা দিচ্ছে জাইকা

বিমানবন্দর সম্প্রসারণ, সেতু নির্মাণ, বিদ্যুৎ সঞ্চালন ও বিদ্যুৎকেন্দ্র স্থাপন, পরিবহণ ব্যবস্থা এবং পানিসম্পদ উন্নয়নের ছয় প্রকল্পে বাংলাদেশকে প্রায় ১৩ হাজার কোটি টাকা ঋণ দিচ্ছে জাপান। গত ২৯ জুন বৃহস্পতিবার অর্থনৈতিক সম্পর্ক বিভাগ (ইআরডি) ও জাপানের আন্তর্জাতিক সহযোগিতা সংস্থার (জাইকা) মধ্যে এ বিষয়ে ঋণ চুক্তি হয়েছে। চুক্তিতে ইআরডির ভারপ্রাপ্ত সচিব কাজী শফিকুল আজম ও জাইকার বাংলাদেশ-প্রধান তাকাতোসি নিশিকাতা স্বাক্ষর করেন। সূত্র-সমকাল (পৃ.১২,ক.১), সংবাদ (পৃ.১৪,ক.৬), ইন্ডিপেনডেন্ট (পৃ.৯,ক.২), এশিয়ান এজ (পৃ.১,ক.৬)।

৮। বিচারকদের চাকরি বিধিমালায় গেজেট ১৫ জুলাইয়ের মধ্যে : আইনমন্ত্রী

নিম্ন আদালতের বিচারকদের চাকরির শৃঙ্খলা ও আচরণ সংক্রান্ত বিধিমালায় গেজেট আগামী ১৫ জুলাইয়ের আগেই প্রকাশ করা হবে বলে আশ্বস্ত করেছেন আইনমন্ত্রী অ্যাডভোকেট আনিসুল হক। গতকাল ২ জুলাই রোববার বিচার প্রশাসন প্রশিক্ষণ ইনস্টিটিউটে এক অনুষ্ঠান শেষে তিনি এ কথা বলেন। সূত্র-সমকাল (পৃ.২,ক.১), সংবাদ (পৃ.১,ক.৮), ডেইলি সান (শেষ পৃ.,ক.১), ইন্ডিপেনডেন্ট (পৃ.১,ক.৫)।

৯। মানবাধিকার সম্মেলন এসডিজি অর্জনে ভূমিকা রাখবে : স্পিকার

কমনওয়েলথ পার্লামেন্টারি অ্যাসোসিয়েশনের (সিপিএ) নির্বাহী কমিটির চেয়ারপারসন ও জাতীয় সংসদের স্পিকার ড. শিরীন শারমিন চৌধুরী বলেছেন, জাতীয় মানবাধিকার কমিশনের উদ্যোগে আঞ্চলিক সম্মেলন এসডিজি অর্জনে ইতিবাচক ভূমিকা রাখবে। গতকাল ২ জুলাই রোববার স্পিকারের সঙ্গে তাঁর কার্যালয়ে জাতীয় মানবাধিকার কমিশনের চেয়ারম্যান কাজী রিয়াজুল হক সৌজন্য সাক্ষাৎ করে সম্মেলন আয়োজনের বিষয়টি অবহিত করলে স্পিকার এসব কথা বলেন। এসডিজির বিভিন্ন লক্ষ্যের সঙ্গে মানবাধিকারের সংশ্লেষ থাকায় জাতীয় মানবাধিকার কমিশন, বাংলাদেশ এর উদ্যোগে ঢাকায় একটি আঞ্চলিক সম্মেলন আয়োজনের বিষয়ে স্পিকারকে অবহিত করেন তিনি। সূত্র-সংবাদ (পৃ.৪,ক.১), ডেইলি সান (পৃ.২,ক.১), নিউজ টুডে (পৃ.২,ক.৪)।

১০। জঙ্গিবাদ নির্মূলে গোটা জাতিকে এগিয়ে আসতে হবে : আইজিপি

হলি আর্টিজানে জঙ্গি হামলার পর জঙ্গিদের বিরুদ্ধে ব্যাপক অভিযান পরিচালনার কথা জানিয়ে পুলিশ প্রধান একেএম শহীদুল হক বলেছেন, জঙ্গিবাদ আমরা পুরোপুরি নির্মূল করতে না পারলেও তাদের শক্তি গুঁড়িয়ে দেওয়া হয়েছে। হলি আর্টিজানের পর বড় বড় জঙ্গিদের পরাস্ত করা হয়েছে। অনেক জঙ্গি নিহত হয়েছে, অনেকে গ্রেফতার হয়েছে এবং জেলে আছে। তবে জঙ্গিবাদ পুরোপুরি নির্মূল করতে হলে গোটা জাতিকে একযোগে এগিয়ে আসতে হবে। গতকাল ২ জুলাই রোববার পুলিশ সদর দফতরে ক্রাইম রিপোর্টার্সদের সঙ্গে ঈদ পুনর্মিলনী অনুষ্ঠানে এসব কথা বলেন আইজিপি একেএম শহীদুল হক। সূত্র-সংবাদ (পৃ.১,ক.৩), সমকাল (পৃ.২,ক.১), ইন্ডিপেনডেন্ট (শেষ পৃ.,ক.১), অবজারভার (পৃ.৩,ক.৭)।

সম্পাদকীয়

- ক. **ইত্তেফাক, প্রথম আলো** : পাহাড় ধসে মৃত্যু রোধ করতে পরিকল্পিত ব্যবস্থা গ্রহণ করার ওপর গুরুত্বারোপ।
- খ. **সংবাদ** : মানবপাচার বন্ধে সরকারকে বৈধ পথে জনশক্তি রপ্তানির উদ্যোগ বাড়ানোর সুপারিশ।
- গ. **জনকণ্ঠ** : দেশে প্রতিবছর রক্তের ব্যাগের প্রয়োজন ৯ লাখ থাকলেও পাওয়া যায় ৭ লাখ ব্যাগ—এ খবরে উদ্বেগ প্রকাশ করে রক্ত সংগ্রহের ব্যাপারে স্বাস্থ্য মন্ত্রণালয়কে জরুরি উদ্যোগ নেওয়ার আহ্বান।
- ঘ. **সমকাল** : দেশের উত্তর-পূর্বাঞ্চল ও উত্তরাঞ্চলে বন্যা পরিস্থিতির অবনতির খবরে উদ্বেগ প্রকাশ করে ত্রাণ ও পুনর্বাসনের প্রস্তুতি নেওয়ার ওপর গুরুত্বারোপ।
- ঙ. **ইন্ডিপেন্ডেন্ট** : ভূমি জরিপ সংক্রান্ত ২ লাখ ৬২ হাজার মামলা পেন্ডিং থাকায় জনদুর্ভোগ লাঘবে আপিল ট্রাইব্যুনাল গঠনের সুপারিশ।
- চ. **ডেইলি সান** : সরকারি হাসপাতালে রোগীর প্রতি ডাক্তারের অবহেলা ও ভুল চিকিৎসার চিত্র তুলে ধরে সঠিক চিকিৎসাসেবা নিশ্চিত করতে কঠোর পদক্ষেপ নেওয়ার আহ্বান।
- ছ. **অবজারভার** : মার্কিন যুক্তরাষ্ট্রের এক প্রকাশনায় বিশ্বের শ্রেষ্ঠ নেতৃত্বের গুণাবলী সম্পন্ন ৬ ব্যক্তির তালিকায় বাংলাদেশের প্রধানমন্ত্রী শেখ হাসিনার নাম থাকা দেশের জন্য গর্বের বিষয় হিসেবে উল্লেখ করে সরকারের নীতিনির্ধারক ও দলীয় নেতাদের দায়িত্ব ও কর্তব্য সততা ও নিষ্ঠার সঙ্গে প্রতিপালনের প্রত্যাশা।
- জ. **নিউজ টুডে** : চিকুনগুনিয়া রোগের হাত থেকে জনগণকে রক্ষা করতে উভয় ঢাকা সিটি করপোরেশনকে সমন্বিতভাবে কার্যক্রম চালানোর আহ্বান।

উপ-সম্পাদকীয়

সমকাল পত্রিকায় জঙ্গিবাদ ও সন্ত্রাসবাদ দমনে সকলের সম্মিলিত প্রচেষ্টা অব্যাহত রাখার আহ্বান।

নিবন্ধ ও ফিচার

যুগান্তর পত্রিকায় 'রাজনৈতিক দুর্বৃত্তায়ন বন্ধ করা প্রয়োজন' শিরোনামের নিবন্ধে সুশাসনের জন্য ঘুষ-দুর্নীতিসহ রাজনৈতিক দুর্বৃত্তায়ন বন্ধ করার আহ্বান।

#

ফাহিমা/শুকলা/মরজিনা/সাইদা/তানিয়া/২০১৭/৯.০০ঘন্টা